



Broj: 02-04-710/25-AP-3
Datum: 29.04.2025. godine

GRADSKO VIJEĆE ZAVIDOVIĆI
n/r PREDSEDavajućoj GRADSKOG VIJEĆA
Hadžić dr Amira, spec. radiolog

PREDMET: Odgovori na vijećnička pitanja sa 5. sjednice Gradskog
vijeća Zavidovići održane 25.03.2025. godine, dostavljaju se

Povodom vijećničkih pitanja postavljenih na 5. sjednice Gradskog vijeća Zavidovići
održanoj 25.03.2025. godine, dostavljamo odgovore na iste kako slijedi:

1. VIJEĆNIČKA PITANJA VIJEĆNIKA IGORA ŠIMŠIĆA

1. Vijećnik Igor Šimšić: **Vijećničko pitanje br.1**

Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća Zavidovići postavljam vijećničko pitanje i zahtjevam detaljna pojašnjenja u vezi sa korištenjem dijela javne parking površine od strane zaposlenika organa Uprave Grada Zavidovići.

Obrazloženje vijećničkog pitanja:

U ulici „Mehmed-paše Sokolovića“, između zgrade organa Uprave Grada Zavidovići i objekta zv. "bivši Inženjering - IP Krivaja Zavidovići" nalazi se parking prostor koji je Odlukom o bezbjednosti i organizaciji saobraćaja na cestama općine Zavidovići jasno determinisan, kategorisan, sa detaljnim, objašnjenim i naznačenim uslovima korištenja, korisnicima, Prostor je podijeljen i kategorisan na dio, tj. parking prostor na kojem se vrši naplata i drugi dio gdje je javni parking prostor, uz sve svoje jasno naznačene karakteristike.

Predmet, zahtjeva za pojašnjenjima, i ovog vijećničkog pitanja je dio javnog parking prostora i površine koja je podijeljena i na kojoj je instalirana i iscrtana horizontalna i vertikalna signalizacija i koja se s tim elementima, po nepoznatom osnovu, diermiše kao rezervisani parking prostor u određenom vremenskom periodu za zaposlenike organa Uprave Grada Zavidovići.

Direktna pitanja na koje se zahtjevaju odgovori: Na osnovu čega je omogućeno korištenje navedenog parking prostora i površine gore navednim licima, na osnovu kojeg dokumenta, akta, na osnovu čega je izvršeno postavljanje horizontalne i vertikalne signalizacije, označavanje rezervacija u nemalom broju parking mjesta i ko je donio odluku o postavljanju pojedinaca ili male grupe kolektiviteta u povoljniji položaj u odnosu na ostale građane u korištenju ove infrastrukture? Naročito, onih koji imaju prebivalište u obližnjim stambenim objektima i koji redovno plaćaju svoju obvezu komunalne naknade? Ukoliko, ne postoji, a indicije i dostupne informacije su da ne postoje niti pravni osnovi, niti akti za uživanje ove „povlastice“, da se hitnim postupkom ukloni signalizacija, i

omogućiti u konačnici bez „povlastica i prioriteta“ korištenje ove infrastrukture, ravnopravno svim građanima.

Pitanja se upućuju Gradonačelnici i nadležnim gradskim službama i zahtjeva hitna intervencija u potrebi.

Odgovor na prvo vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-187/25 od 15.04.2025. godine): Odlukom o bezbjednosti i organizaciji saobraćaja na cestama općine Zavidovići („Službeni glasnik Općine Zavidovići“, broj: 10/21) u članu 25 stav (3) određeno je:

Pravilnikom o postupku davanja na korištenje javnih parkirališta („Službeni glasnik Općine Zavidovići“, broj: 5/10, 8/11, 10/11 i 8/15) bliže je regulisan postupak raspisivanja javnog oglasa za dodjelu, parking prostora, koji su predmet dodjele, podnošenje prijava na javni oglas, sadržaj prijava, imenovanje i sastav komisije, nadležnost komisije, kriterije za odabir najpovoljnijeg kandidata za dodjelu parkirališta, pravo na pravni lijek, zaključivanje ugovora i ostala pitanja značajna za provođenje postupka dodjele parkirališta pravnim licima radi pružanja usluga i održavanja javnih parkirališta uz naplatu, rezervaciju parking prostora za fizička lica.

Pravilnikom o postupku davanja na korištenje javnih parkirališta („Službeni glasnik Općine Zavidovići“, broj: 5/10, 8/11, 10/11 i 8/15) određeno je da je na parkiralištu između salona namještaja i ulice „Mehmed-paše Sokolović“, do realizacije Regulacionog plana „Centar 1“, prvi red parkirališnih mjesta na drugom nivou parkirališta posmatrajući prema zgradi Općine Zavidovići, rezervisan za parkiranje vozila zaposlenih Općine Zavidovići, Porezne ispostave Zavidovići, Ministarstva unutrašnjih poslova Zeničko-dobojskog kantona, Policijske uprave Zavidovići bez plaćanja naknade za parkiranje svakim radnim danom do 15.30 sati.

Imajući u vidu naprijed navedeno, korištenje parking prostora zaposlenicima Gradske uprave Zavidovići, Porezne ispostave Zavidovići, MUP-a Zeničko-dobojskog kantona, Policijske uprave Zavidovići u toku radnog vremena, na navedenoj lokaciji omogućeno je Odlukom o bezbjednosti i organizaciji saobraćaja na cestama općine Zavidovići i Pravilnikom o postupku davanja na korištenje javnih parkirališta.

2. Vijećnik Igor Šimšić: **Vijećničko pitanje br.2**

Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća Zavidovići postavljam vijećničko pitanje koje se tiče statusa Javnog poziva za nadzidiivanje-nadogradnju zgrade zv. „Stara općina“ vlasništvo Grada Zavidovići.

Obrazloženje vijećničkog pitanja:

Dana, 17.05.2024. godine, na osnovu člana 2. Odluke o davanju prethodne saglasnosti za nadzidiivanje zgrade („Službeni glasnik općine Zavidovići“ broj: 9/2017) i tačke II Rješenja Općinskog vijeća Zavidovići broj: 01-19-135/22-AP-4 od 31.01.2022. godine o imenovanju stručne Komisije za objavljivanje javnog poziva i provođenje postupka odabira najpovoljnijeg ponuđača - investitora za nadzidiivanje zgrade zv. „Stara općina“ objavljen je Javni poziv za nadzidiivanje-nadogradnju zgrade zv. „Stara općina“, vlasništvo Grada Zavidovići.

U nedostatku i nedostupnosti informacija po ovoj predmetnoj stvari postavljam ovo vijećničko pitanje s ciljem dobijanja relevantnih informacija u kojoj je fazi ovaj postupak, da li postoje eventualni problemi u realizaciji, kada se planira konačna realizacija svih aktivnosti, i sl?

Pitanja se upućuju Gradonačelnici i nadležnim gradskim službama.

Odgovor na drugo vijećničko pitanje (Odgovor je sačinjen na osnovu akta Službe za upravu geodetskih, imovinskopравnih poslova i urbanizam, broj: 06-45-20/25-AP-27 od 16.04.2025. godine): Odlukom Općinskog vijeća Zavidovići, broj: 01-23-2647/17-AP-12 od 31.10.2017. godine data je prethodna saglasnost za nadziđivanje zgrade zv. „Stara općina“, izgrađene na k.č. 1130/8 k.o. Zavidovići, površine 878 m², upisana u P.L. 232 k.o. Zavidovići i Zemljišno-knjižni uložak broj 260 k.o. Zavidovići, posjed i vlasništvo Grada Zavidovići sa dijelom 1/1, a u skladu sa Regulacionim planom „Centar I“ Zavidovići.

U skladu sa članom 2. navedene odluke Općinsko vijeće je donijelo Rješenje, broj: 01-19-1135/22-AP-4 od 31.01.2022. godine o imenovanju stručne komisije za objavljivanje javnog poziva i provođenje postupka odabira najpovoljnijeg ponuđača - investitora za nadziđivanje zgrade zv. „Stara općina“.

Postupajući po istom Rješenju komisija je objavila Javni poziv, broj: 01-19-135/22-AP-7 od 17.05.2024. godine za nadziđivanje zgrade u kome je odredila predmet javnog poziva, lokaciju, uslove nadziđivanja i obaveze investitora, pravo učešća, kriterij odabira, način podnošenja prijave i provođenje javnog poziva. Javni poziv je objavljen u listu „Naša riječ“, oglasnoj ploči Grada Zavidovići i Web stranici Grada Zavidovići.

Po javnom pozivu Komisija je provela postupak i odabir najpovoljnijeg ponuđača o čemu je sačinila Zapisnik, broj: 01-19-135/22-AP-8 od 25.06.2024. godine, te je prihvatila i najpovoljnije ocijenila ponudu GP „Tuzlić“ d.o.o. Zavidovići sa posebnom ponudom o dodatnim radovima izraženim u novčanim vrijednostima u iznosu od 101.000,00 KM bez PDV-a, odnosno 118.170,00 KM sa PDV-om.

Nakon provedenog postupka pripremljen je Prijedlog Odluke o davanju saglasnosti za nadziđivanje zgrade zv. „Stara općina“, a koji Prijedlog Zaključkom Gradonačelnice Zavidovići, broj: 02-04-1778/24-AP-2 od 09.12.2024. godine nije prihvaćen, zbog neriješenih imovinskih odnosa unutar zgrade zvana „Stara Općina“ između Grada Zavidovići i ostalih korisnika koji ističu pravo vlasništva na prostorijama koje koriste unutar zgrade i zbog izrade drugog prijedloga vezano za pitanje zgrade „Stara općina“.

Istim zaključkom je Službi za upravu geodetskih, imovinskopравnih poslova i urbanizma naloženo da pripremi Prijedlog Odluke o ukidanju Odluke o davanju prethodne saglasnosti za nadziđivanje zgrade, te je Služba pripremila navedeni Prijedlog Odluke i dostavila Gradonačelnici na razmatranje i dalju proceduru.

3. Vijećnik Igor Šimšić: **Vijećničko pitanje br.3**

Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća Zavidovići postavljam vijećničko pitanje koje se tiče statusa usvojene Inicijative i Zaključka GV Zavidovići o realizaciji Odluke hitne izrade Programa uređenja građevinskog zemljišta.

Obrazloženje vijećničkog pitanja:

U avgustu mjesecu 2023.godine, usvojena je Inicijativa Kluba vijećnika SDP BiH u GV Zavidovići i Odluka o hitnoj izradi Programa uređenja građevinskog zemljišta. Inicijativa je delegirana i zahtjevala hitnost postupanja, uzimajući u obzir činjenicu da Program uređenja građevinskog zemljišta kao dokument obavezan iz zakonskih odredbi, u našoj lokalnoj zajednici uopšte ne postoji.

Obzirom da je odredbom člana 58.stav (2) i (3) Zakona o prostornom uređenju i građenju (Službene novine Zeničko-dobojskog kantona, broj: 1/14 i 4/16) propisano da program uređenja građevinskog zemljišta usvaja Gradsko vijeće na prijedlog Gradonačelnika/ce, a da Program uređenja zemljišta priprema i provodi nadležna gradska služba, postavljam vijećničko pitanje statusa ovog akta. Više od 19 mjeseci, jedan od ključnih i važnih

dokumenata prostorno-planske i građevinske dokumentacije nije pripremljen, niti je delegiran od strane nadležnih autoriteta na raspravu i usvajanje Gradskom vijeću. Uz dodatna pojašnjenja, zašto se nije ova obaveza odradila, ko je odgovoran i kada možemo konačno očekivati ovaj dokument pred gradskim vijećnicima?

Zahtijevam hitnu intervenciju kako bismo preduprijedili neželjene posljedice, ali i kako bismo konačno obezbijedili legalnost provođenja postupaka po ovoj problematici, na što nas obavezuju zakonske norme.

Pitanja se upućuju Gradonačelnici i nadležnim gradskim službama, uz očekivanje tačnih i jasnih odgovora.

Odgovor na treće vijećničko pitanje (Odgovor je sačinjen na osnovu akta Službe za upravu geodetskih, imovinskopравnih poslova i urbanizam, broj: 06-45-20/25-AP-27 od 16.04.2025. godine): Programom rada Gradskog vijeća Zavidovići za 2025. godinu predviđeno je da se u mjesecu martu 2025. godine razmatra program uređenja gradskog građevinskog zemljišta za period 2025.- 2027. godine.

Službe koje su zadužene za izradu su Služba za upravu geodetskih, imovinskopравnih poslova i urbanizma kao nosilac aktivnosti i Služba za upravu privrede, lokalni razvoj, infrastrukturu i međunarodnu saradnju, te Služba za upravu finansija, budžet i trezor, te navedene službe trenutno provode aktivnosti na izradi navedenog programa.

2. VIJEĆNIČKO PITANJE VIJEĆNIKA ADMIRA FOJNICE

Vijećnik Admir Fojnica: Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća postavljam vijećničko pitanje a tiče se trenutnog statusa ulice 4. Manevarski bataljon (bivša Markovac).

Obrazloženje vijećničkog pitanja:

Ulica 4. Manevarski bataljon (Bivša Markovac) nalazi se u MZ "Asim Čamdžić" ispod naselja Vučjak. Navedena ulica se nalazi ispod naselja Vučjak u dužini od 790m, a pitanje je u kojoj se dužini stvarno koristi, kada su u pitanju sami mještani navedene ulice.

Dio privatnih kuća, ispod te ulice, koje su dobijale građevinske dozvole za gradnju stambenih jedinica, trenutno nisu u mogućnosti da istu koriste zbog nasipanja prvobitnog nivoa ulice, nakon čega je na jednom mjestu infiltrirala u privatni posjed i u većem dijelu ne može služiti ostalim mještanima.

U prilogu dostavljam kopiju katastarskog plana i tražim odgovor u pisanoj formi."

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-9-187/25 od 15.04.2025. godine): Obzirom da samo pitanje nije precizno postavljeno, ali na osnovu dostavljene kopije katastarskog plana za k.č. 1198, k.o. Zavidovići dajemo sljedeći odgovor:

Navedena parcela k.č. 1198, k.o. Zavidovići na kojoj su 90-tih godina postojali uplanjeni objekti imala je obezbijeđen pristup iz Gazi Husrev-begove ulice. Uvidom u katastar ova parcela je cijepana na tri parcele k.č. 1198/1, k.č. 1198/2 i k.č. 1198/3. Novonastala parcela k.č. 1198/1 ostala je izgrađena parcela koja ima pristup iz Gazi Husrev-begove ulice, dok su novonastale parcele k.č. 1198/2 i k.č. 1198/3 neizgrađene parcele i imaju mogućnost pristupa iz ulice „4. manevarski bataljon“. Izgradnja samog pristupa neizgrađenim parcelama nije obaveza Grada Zavidovići, već investitora, a uslovi za izgradnju istog se određuju u postupku izdavanja odobrenja za građenje.

3. VIJEĆNIČKO PITANJE VIJEĆNICE AMRE JUPIĆ

Vijećnica Amra JupiĆ: „Tražim kao gradska vijećnica da se pripremi Informacija od strane Službe za upravljanje poljoprivrede, vodoprivrede i komunalnih poslova u saradnji sa JKP Radnik d.o.o. Zavidovići u kojoj će se navesti ko je odobrio JKP Radnik d.o.o. Zavidovići da i dalje koristi za odlaganje otpada zatvorenu gradsku deponiju koja je locirana u industrijskoj zoni Ekonomija Batvice čime se na najbolji način pokazuje nebriga za našu privredu . Gradska deponija je zatvorena Rješenjem Federalne inspekcije , sa tačnim zadacima i rokovima zatvaranja . I pored toga uprava preduzeća i dalje krši zabranu odlaganja smeća , pa makar to bio i kruti otpad ili šut na Gradsku deponiju . Na ovaj način se derogira kompletan Plan upravljanja i odlaganja otpada koji podrazumjeva isključivo prikupljanje i odvoz otpada sa područja Grada Zavidovići na regionalnu deponiju Mošćanica Vijeće mora stajati iza svojih odluka i odluka se definitivno prevashodno zbog zaštite životne sredine naše jedinice lokalne samouprave, da se smeće vozi na Mošćanicu treba i mora poštovati od strane preduzeća čiji smo osnivač i čiji rad Grad Zavidovići uveliko finansira . Nema samovolje u radu i ne smije biti, pa je konačno vrijeme da se zabrana rada Gradske deponije i realizira u praksi stavljanjem adekvatne ograde, postavljanjem kamere koja će biti povezana sa policijom i Gradom, kako bi se odmah evidentirali počinitelji prekršaja i propisno kaznili. Uvijek postoji način ako postoji volja, a kršenjem Rješenja o zabrani rada Gradske deponije počinitelji ulaze u poziciju činjenja krivičnog djela, pa pitam je li nam to treba ?

Tražimo da nam se u Informaciji o stanju deponije, izvesti o tome jesu li nadležne inspekcije Grada poduzele i donijele mjere iz svoje nadležnosti, te koje . Tražimo i dostavu kopije Rješenja o zabrani rada deponije i njenom zatvaranju , i navođenje u Informaciji koraka kako i kada se planira okončati odvoz smeća na gradsku deponiju koja bi morala biti zapečaćena i svaki prolazak bi morao biti sankcionisan i efektivno spriječen.“

Odgovor na vijećničko pitanje (Odgovor je sačinjen na osnovu akta Službe za upravljanje poljoprivrede, vodoprivrede i komunalnih poslova, broj: 08-45-22/25-AP-69 od 16.04.2025. godine): Ovim putem Vas obavještavamo da je navedeno vijećničko pitanje upućeno JKP „Radnik“ kako bi isto dostavilo odgovor odnosno očitovalo se po istom. Nakon što se JKP „Radnik“ izjasni po navedenom pitanju od strane ove Službe bit će dostavljen odgovor na ovo vijećničko pitanje.

4. VIJEĆNIČKA PITANJA VIJEĆNIKA AMERA AVDIČEVIĆA

1. Vijećnik Amer Avdićević: **Vijećničko pitanje br.1**

„Na osnovu Člana 8. i 87. Poslovnika o radu Gradskog vijeća Zavidovići postavljam slijedeće pitanje:

Zahtijevam da se Gradskom vijeću Zavidovići dostavi potpuna dokumentacija vezana za Ugovor iz 2023. godine zaključen sa firmom Hajdić d.o.o. u iznosu od 101.571,00KM, a vezano za isporuku asfalta za potrebe modernizacije cesta na području Grada Zavidovići.

2. Vijećnik Amer Avdićević: **Vijećničko pitanje br.2**

Na osnovu Člana 8. i 87. Poslovnika o radu Gradskog vijeća Zavidovići postavljam slijedeće pitanje:

Zahtijevam da se Gradskom vijeću Zavidovići dostavi potpuna dokumentacija vezana za Ugovor iz 2023. godine zaključen sa firmom GP Heldovac u iznosu od 183.030,00KM, a vezano za isporuku betona za potrebe modernizacije cesta na području Grada Zavidovići.

Odgovor na prvo i drugo vijećničko pitanje (Odgovor je sačinjen na osnovu akta Službe za upravu finansija, budžet i trezor, broj: 05-45-11/25-AP-5 od 11.04.2025. godine): Stručna služba za upravu finansija, budžet i trezor Grada Zavidovića provodi postupke javne nabavke na osnovu pismenog zahtjeva za realizaciju javne nabavke koji gradske službe za upravu, posebne službe i Gradsko pravobranilaštvo Zavidovići podnose Gradonačelnici u skladu sa odredbama Pravilnika o internim procedurama u postupku nabavki roba, usluga i radova i direktnom sporazumu („Službeni glasnik Grada Zavidovići“, broj: 1/2022 i 6/2023).

Na osnovu pismenog zahtjeva Službe za upravu privrede, lokalni razvoj, i infrastrukturu i međunarodnu saradnju proveden je postupak javne nabavke radova „Nabavka, transport i isporuka cement-betona za potrebe modernizacije cesta na području Grada Zavidovići“ na osnovu kojeg je zaključen Ugovor o nabavci, transportu i isporuci cement-betona C 25/30 (MB 30) za potrebe modernizacije cesta na području Grada Zavidovići, broj: 02-11-2676/22-AP-8 dana 05.12.2022. godinu i postupak „Nabavka, isporuka i ugradnja asfalta za potrebe modernizacije cesta na području Grada Zavidovići u 2023. godini“ na osnovu čega je zaključen Okvirni sporazum o nabavci i sukcesivnom izvođenju radova – „Nabavka, isporuka i ugradnja asfalta za potrebe modernizacije cesta na području Grada Zavidovići u 2023. godini“, broj: 02-11-794/23-AP-8 dana 18.05.2023. godine.

Svi postupci javnih nabavki, provode se u skladu sa Zakonom o javnim nabavkama („Službeni glasnik BiH“, broj: 39/14, 59/22 i 50/24) od 01.06.2021. godine do danas, svi podaci odnosno odluke o izboru napovoljnijeg ponuđača, odluke o poništenju ili otkazivanju javne nabavke, kao i godišnji izvještaji o zaključenim ugovorima (za 2021. godinu i 2022. godinu) sa ponuđačima objavljivali su se i mogu se naći na našoj web stranici www.zavidovici.ba, istovremeno sa upućivanjem ponuđačima koji su učestvovali u postupku javne nabavke, u skladu sa članom 70. stav (6) Zakona.

Stupanjem na snagu izmjenama zakona o javnim nabavkama objavljen u “Službenom glasniku BiH”, broj: 59/22 dana 02.09.2022. godine i koji je stupio na snagu osmog dana od dana objavljivanja u „Službenom glasniku BiH“, a čija je primjena počela u decembru 2022. godine, Grad Zavidovići najkasnije u roku od 30 dana od dana zaključenja ugovora odnosno nastale izmjene objavljuje obavještenje o dodjeli ugovora sa svim potrebnim podacima i osnovne elemente ugovora (vrijednost, period trajanja, rok izvršenja, rok plaćanja, garantni period itd.) za sve postupke javne nabavke, kao i sve izmjene ugovora do kojih dođe u toku realizacije ugovora na portalu javnih nabavki.

Portal javnih nabavki je informacioni sistem koji omogućava elektronsku komunikaciju, objavljivanje dokumenata i sprovođenje postupaka javne nabavke elektronskim putem, što znači da se na portalu javnih nabavki mogu vidjeti svi podaci od pokretanja postupka javnih nabavki do zaključivanja odnosno dodjele ugovora ponuđačima.

Potencijalni ponuđači i zainteresovana lica, kao i građani mogu da pretražuju ugovorne organe i postupke javnih nabavki u baneru Pretraga gde se mogu pretraživati i pregledati svi oglasi objavljeni po Zakonu o javnim nabavkama. Korištenje, odnosno, pretraga Portala je besplatna, ne zahtjeva nikakvu registraciju i anonimna je.

Također, ovo je bila primjedba iz Izvještaja o reviziji, na osnovu čega je Gradsko vijeće donijelo Zaključak, broj: 01-11-368/25-AP-3 od 27.02.2025. godine, kojim se zadužila Gradonačelnica sa nadležnom službom da u roku od 6 (šest) mjeseci od dana usvajanja Plana aktivnosti na otklanjanju slabosti, neregularnosti i prekršaja identifikovanih u Izvještaju o finansijskoj reviziji Grada Zavidovići za 2023. godinu, dostavi Vijeću Informaciju o realizaciji Plana aktivnosti na otklanjanju slabosti neregularnosti i prekršaja identifikovanih u Izvještaju o finansijskoj reviziji Grada Zavidovići za 2023. godinu.

3. Vijećnik Amer Avdičević: **Vijećničko pitanje br.3**

Na osnovu Člana 8. i 87. Poslovnika o radu Gradskog vijeća Zavidovići postavljam slijedeće pitanje:

Da li su okončane aktivnosti, kako bi se budžetski korisnici odnosno Javne ustanove kojima je Grad osnivač i koje se finansiraju preko 50% iz budžeta Grada Zavidovići uvrstile u Registar budžetskih korisnika i uključili u trezorski način poslovanja?

Radi se konkretno o ustanovama JU Gradski dječji vrtić Zavidovići, JU Kulturno-sportski centar Zavidovići i JU Centar za socijalni rad Zavidovići.“

Odgovor na treće vijećničko pitanje (Odgovor je sačinjen na osnovu akta Službe za upravu finansija, budžet i trezor, broj: 05-45-11/25-AP-5 od 11.04.2025. godine): Nisu okončane aktivnosti, kako bi se javne ustanove kojima je Grad osnivač i koje se finansiraju preko 50% iz Budžeta Grada Zavidovići, uvrstile u Registar budžetskih korisnika i uključili u trezorski sistem poslovanja. Uvođenje u sistem trezorskog poslovanja javnih ustanova potrebo je provoditi postupno, obzirom da iste imaju određene organizacijske neusklađenosti, kao i finansijske neusklađenosti s implementacijskim aktivnostima uvođenja trezora i trezorskog poslovanja. Takođe je potrebno uskladiti internu pravnu regulativu jedinstvenog organa uprave i javnih ustanova.

Obzirom da je 18.02.2025. godine usvojen Pravilnik o uspostavi trezorskog načina poslovanja u jedinstvenom organu uprave i drugim organima Grada Zavidovići, broj: 02-11-2149/24-AP-2 („Službeni glasnik Grada Zavidovići“, broj: 2/2025), do kraja mjeseca maja 2025. godine, bit će objavljen registar budžetskih korisnika Grada Zavidovići za 2026. godinu u kojem će biti određeno koje od javnih ustanova su budžetski korisnici u skladu sa zakonskim i podzakonskim aktima.

5. VIJEĆNIČKO PITANJE VIJEĆNIKA DEMIRA BULJUBAŠIĆA

Vijećnik Demir Buljubašić: Na osnovu Člana 8. i 87. Poslovnika o radu Gradskog vijeća Zavidovići postavljam Vijećničko pitanje:

Zašto se inicijative prošlog saziva Gradskog vijeća Zavidovići nisu našle na dnevnom redu.

Odgovor na vijećničko pitanje (Odgovor je sačinjen na osnovu akta Stručne službe Gradskog vijeća, broj: 01-04-720/25-AP-2 od 21.04.2025. godine): Posljednja 27. sjednica Gradskog vijeća Zavidovići iz starog saziva (2020. – 2024. godina), održana je dana 31.07.2024. godine.

Uvidom u predmet, broj: 01-04-1644/24, na 27. sjednici Gradskog vijeća održanoj dana 31.07.2024. godine, podnesene su tri vijećničke inicijative, i to:

1. Inicijativa vijećnika Harisa Hodžića – Inicijativa za donošenje odluke o pokretanju aktivnosti na izradi projektne dokumentacije za izgradnju etažnog parkirališta na parceli k.č. 1132, 1131/1; 1131/4; 1131/5; 1131/7; 1131/8; 1131/10; 1131/11, 1131/13, 1131/14; 1131/15; 1131/16; 1131/18 i 1131/19 K.O. Zavidovići, (Mišljenje Gradonačelnika iz bivšeg saziva pribavljeno dana 09.08.2024. godine - negativan stav).

2. Inicijativa vijećnika Demira Buljubašića – Inicijativa za izgradnju mosta u naseljenom mjestu Kučice, (Mišljenje Gradonačelnika iz bivšeg saziva pribavljeno dana 09.08.2024. godine – djelimično prihvaćena).

3. Inicijativa vijećnika Demira Buljubašića – Inicijativa za izgradnju javne rasvjete u naseljenom mjestu Tribići, (Mišljenje Gradonačelnika iz bivšeg saziva pribavljeno dana 09.08.2024. godine – djelimično prihvaćena).

Novi saziv Gradskog vijeća Zavidovići održao je Konstituirajuću sjednicu dana 29.11. i 10.12.2024. godine i 2. sjednicu Gradskog vijeća Zavidovići dana 26.12.2024. godine.

Na 2. sjednici Gradskog vijeća Zavidovići, održanoj dana 26.12.2024. godine, donesena je Odluka o privremenom finansiranju Grada Zavidovići za period 01.01. 2025. - 31.03.2025. godine („Službeni glasnik Grada Zavidovići“, broj: 10/2024), a na 5. sjednici Gradskog vijeća održanoj dana 25.03.2025. godine, usvojen je Budžet Grada Zavidovići za 2025. godinu („Službeni glasnik Grada Zavidovići“, 3/2025).

Obzirom da realizacija predmetnih inicijativa zahtijevaju finansiranje iz Budžeta Grada Zavidovići, predmetne inicijative po okončanju Budžetske 2024. godine, nisu uvrštene u dnevni red novog saziva Gradskog vijeća Zavidovići.

6. VIJEĆNIČKO PITANJE VIJEĆNICE AMIRE HADŽIĆ

Vijećnica Amira Hadžić: Pitanje upućujem Gradonačelnici, Nadzornom odboru JKP Radnik, Skupštini JKP Radnik i drugim nadležnim službama.

Koje mjere namjeravaju poduzeti da zaustave pljačkanje naših građana od strane JKP, konkretno naplate računa u punom iznosu za toplotnu energiju koja nije isporučena.“

Odgovor na vijećničko pitanje (Odgovor je sačinjen na osnovu akta Službe za upravu poljoprivrede, vodoprivrede i komunalnih poslova, broj: 08-45-22/25-AP-69 od .04.2025. godine): Ovim putem Vas obavještavamo da je navedeno vijećničko pitanje upućeno JKP „Radnik“ kako bi isto dostavilo odgovor odnosno očitovalo se po istom. Nakon što se JKP „Radnik“ izjasni po navedenom pitanju od strane ove Službe bit će dostavljen odgovor na ovo vijećničko pitanje.

7. DOPUNSKA VIJEĆNIČKA PITANJA VIJEĆNIKA AJDINA POLIĆA

1. Vijećnik Ajdin Polić: „Imam dopunska pitanja.

Kada je u pitanju odgovor na pitanja koja sam postavio na 3. sjednici, treće pitanja, radi se o dopisu po nazivom Obavijest o neposrednoj opasnosti po život mještana, tražim izjašnjenje o poduzetim radnjama Službe za upravu geodetskih i imovinsko pravnih odnosa, s obzirom da je Služba za upravu ekonomskih poslova zaprimila i obradila predmet te prosljedila dalje Službu za upravu imovinskih poslova, a s obzirom da su oni trebali preduzeti određene radnji a od njih nismo dobili nikakav odgovor po tom osnovu tražim odgovor. Hvala.“

Odgovor na dopunsko vijećničko pitanje (Odgovor je sačinjen na osnovu akta Službe za upravu geodetskih, imovinskopravnih poslova i urbanizam, broj: 06-45-20/25-AP-27 od 16.04.2025. godine): Zakon o prostornom uređenju i građenju („Službene novine Zeničko-dobojskog kantona“, broj: 17/23) propisuje postupak izdavanja odobrenja za uklanjanje, kako po zahtjevu vlasnika građevine tako i uklanjanje građevine zbog fizičke dotrajalosti ili oštećenja. Nadležna služba za donošenje gore navedenog rješenja u ovom slučaju ne može postupiti jer se nisu stekli uslovi za donošenje predmetnog rješenja. Sredstva planirana budžetom Grada Zavidovići nisu dovoljna za rješavanje, jer bi se u konkretnom slučaju primijenile odredbe Zakona o upravnom postupku koje se odnose na prinudno izvršenje rješenja.

Potrebno je istaći da se radi o privatnoj imovini i nastojaće se riješiti ovaj problem na način kojim se neće kršiti odredbe zakona o pravu na posjed, korištenje i raspolaganje istom.

2. Vijećnik Ajdin Polić: „Imam dopunsko pitanje vezano za moje 5. pitanje, naime radi od zahtjevu UG Gvozdeni most o organizaciji ulice Enesa Kalabića, odnosno za davanje urbanističke i građevinske saglasnosti nakon proširenja. U samom pitanju sam naveo da

pitanja postavljam Pravobranilaštvu, a odgovor sam dobio od Službe za privredu. Pa bih zamolio da dobijem odgovor od Pravobranilaštva s obzirom da je predmet kod njih, pa me zanima koji je status predmeta. Da li je išta učinjeno, da li išta nije učinjeno s obzirom evo da je predmet godinu dana kod njih kako je zaprimljen. Odgovorima na ostala pitanja sam zadovoljan. Hvala.“

Odgovor na dopunsko vijećničko pitanje (Odgovor je sačinjen na osnovu akta Gradskog pravobranilaštva Zavidovići, broj: R-35/25 od 28.04.2025. godine): Ovim putem vas obavještavamo da ovom pravobranilaštvu prema postojećim evidencijama još uvijek od strane nadležne službe nije dostavljen elaborat o opravdanosti izvođenja radova iako je zaprimljena i evidentirana inicijativa za pokretanje postupka utvrđivanja javnog interesa, s tim da bez predmetnog elaborata nismo u mogućnosti pokrenuti postupak utvrđivanja javnog interesa prema Gradskom vijeću.

S poštovanjem

PO RJEŠENJU GRADONAČELNICE
broj: 02-04-3/25-AP-2 od 03.01.2025. godine
SEKRETAR GRADSKOG ORGANA
DRŽAVNE SLUŽBE

Dostavljeno:

1. Naslovu,
2. U spis.

Nermin Čahtarević, dipl. pravnik